

Høyanger, 26.9.19

Olje- og energidep.

- via <https://www.regjeringen.no/no/dokumenter/horing--nves-forslag-til-en-nasjonal-ramme-for-vindkraft-pa-land/id2639213/>
- via postmottak@oed.no

HØYRINGSFRÅSEGN OM NASJONAL RAMME FOR VINDKRAFT

Samandrag

Høyringsfråsegna vår til Olje- og energidepartementet (OED) handlar om *Høyanger sine areal i delområde Sunnfjord og Sogn og delområde Nordhordland og Gulen*. Vi vil argumentere for at områda i vår kommune, skal ut av ramma. Størstedelen av utmarksområda som NVE har funne "egnede" er etter vår meining ueigna når ein legg den store lokale verdien og omfattande bruken til grunn. Desse naturlandskapa, og den moglegheita for kortreist friluftsliv dei gjev, er dei områda som har desidert mest å bety for innbyggjarane i vår kommune – noko landet må ta omsyn til.

--

Dei fleste av Raudt Høyanger sine medlemmar er gjennom offentlege informasjonsmøte, eigne medlemsmøte og mediaoppslag blitt kjende med mange sider av kva ei vindkraftutbygging vil seie. Vi vel å bruke Høyanger kommunestyre sine ord og siterer frå kommunestyrevedtak 20.6.19:

"Eit vindkraftanlegg høgt til fjells er å sjå på som eit stort industrianlegg, ofte plassert i urørt natur. Den teknologiske utviklinga i bransjen går i retning av høgare master med breiare vengespenn. Vindkraftanlegga legg beslag på eit monaleg større areal enn dei fysiske vindturbinane er plasserte. Naturinngrepa i tilknytning til vegane til anlegga vil også føre til store irreversible sår i naturen. Fleire vil karakterisere dette som visuell forsøpling. Ein er redd for støy frå mastene, og sjølve anlegga vil vere til stor sjenanse for alle dei som vil ha ei genuin naturoppleving i fjellet."

Mange har høyrte og sett argumentet frå vindkraftutbyggjarar at utmarka vår, ikkje minst fjellområda våre, er utbygde frå før med vassdragsreguleringar og kraftlinjer. Raudt Høyanger ser poenget, men meiner at eksisterande inngrep er svært lite devaluerande samanlikna med dei omfattande inngrepa frå vindkraftutbygging. I tillegg til dette, når tidlegare inngrep skal sjåast belastande på naturlandskapet, må det vere eit poeng å unngå nye og større belastningar.

Raudt Høyanger vil også understreke at følgjande **analysar er gjort av Miljødirektoratet (MD)**:

- "... vestre Høyanger har flere våtmarksområder som er verna både som ..."
- "Naturverdiene i fjellområda er dårlig kartlagt og lite kjent"
- "Det er også verdifulle, sammenhengende naturområder i de sentrale og østlige fjellområder innenfor analyseområdet"... Det er spesielt nemnt "større, sammenhengende områder mellom Lavik og Vadheim"
- "Med unntak for veier og ei større kraftlinje nord-sør er den aller østligste delen av området stort sett urørt, sammenhengende natur"

Dette er i sum moment som **taler mot at utmarksareala i Høyanger kommune skal sjåast som eigna for vindkraft.**


Naturlandskapa våre er dei viktigaste rekreasjonsområda for menneska i vår kommune fordi det gjev oss moglegheit til kortreiste og derfor langt meir brukte friluftsområde enn dei som har ein såpass mykje høgare nasjonal verdi at dei har fått ein eller annan vernestatus.

Naturlandskapa er også leveområde for dyr, fuglar og planter. Og, når naturverdiane, som MD skriv, er "dårlig kartlagt og lite kjent", skal ein heller ikkje sjå bort frå at her **kan finnast** førebels skjulte nasjonale verdier. Det krev ei **føre var-haldning** som må gjere areala i vår kommune ueigna for vindkraftutbygging.

Raudt Høyanger vil til slutt trekkje fram at Noreg faktisk har eit kraftoverskot. Det finst også mange analysar som viser at behovet for elektrifisering kan dekkast på andre og mindre landskaps- og miljøkrevjande måtar enn vindkraft. Etter det meste å dømme, vil auka kraftproduksjon auke krafteksporten og dermed føre til import av EU sine høgare kraftprisar. Dette vil innebære ei auka belastning særleg for dei økonomisk vanskelegstilte i landet vårt og for næringslivet, særleg kraftkrevjande industri, som er livsnerven i Høyanger kommune. I dette perspektivet kan ein, om ein dermed vel å heve seg over diskusjonen om kva område som er eigna og ikkje for vindkraft, seie eit generelt nei til vindkraft.

Vi har likevel i denne fråsegna valt å leggje absolutt hovudvekt på at utmarksområda i vår kommune er så verdifulle for menneska som rekreasjonsområde og for samfunnet i eit folkehelseperspektiv at områda må sjåast som ueigna for vindkraft.

Med helsing
Raudt Høyanger


Einar Rysjedal, leiar